

## AVANTURISTIČKI TURIZAM

Zahvaljujući prirodnom bogatstvu, planinama, kanjonima i rijekama, Bosna i Hercegovina ima idealne uslove za razvoj avanturističkog turizma. Avanturistički turizam nudi kombinaciju brdskog biciklizma, vožnju splavom i čamcem (rafting) rijekama, paraglajding, spuštanje padobranom i terensko jahanje uz odmor, opuštanje i razgledanje prirodnih ljepota. Avanturistički turizam predstavlja spoj avanture, rekreacije, opuštanja i zabave kako bi se turisti udaljili od svakodnevnih problema i stresnih situacija.

Bjelašnica, Igman, Jahorina, kao i Treskavica, Romanija, Prenj, Čvrstica, Zelengora, Velež, Vranica i Ozren nude mogućnost kampovanja, planinarenja, penjanja po stijenama, brdski biciklizam, paraglajding i skakanje sa padobranom, a rijeke Tara, Una, Neretva i Vrbas pružaju uslove za rafting, splavarenje i vožnju kajakom. Rijeka Vrbas bila je domaćin Svjetskog prvenstva u raftingu u 2009. godini i Evropskog prvenstva u kajaku i kanuu u 2011. godini, a "National Geographic Traveler" je kao najbolju turističku turu u 2012. godini preporučio rafting na Tari, Neretvi i Vrbasu.

Ljubitelji brdskog biciklizma mogu uživati u vožnji kroz prekrasne šume i planinarske staze na Trebeviću, Ozrenu, Igmanu, Bjelašnici, Visočici, Veležu, Vranici, Vlašiću, Zvijezdi, Jahorini, Romaniji, Treskavici, Bitovnji, Zelengori i Majeveci.

Boravak u prelijepoj i netaknutoj prirodi, na nekom mjestu pored jezera, rijeka ili na planini nudi mnogo kampova u Bosni i Hercegovini od kojih ćemo nabrojati: Turističko naselje "Ada" u Ustikolini, Aduna kamp "Orljani", kampovi "Bijeli" i "Una Rafting Kiro" kod Bihaca, Turistički centar "Balkana" kod Mrkonjić Grada, kampovi "Brštanovica", "Tara – Raft", "Sastavci" i "Montings" kod Foče, Eko - centar "Ljekarice" kod Prijedora, kamp "Mlinska Rijeka" kod Čelinca, kamp "Oaza" kod Konjica, Hotelsko naselje i kamp "Oaza" kod Sarajeva, kamp "Ontario" kod Lukavca, kamp "Orlovo jezero" kod Petrova, kamp "Ramska kuća" kod Prozora, kamp "Scorpio" kod Zenice, tri kampa u Nacionalnom parku Sutjeska: na Tjentištu, Suhoj gori i Orlovačkom jezeru, kamp "Unis ishrana" na Boračkom jezeru, kamp "Zebed" kod Gradačca, kamp "Zelengora" kod Jablanice, kamp "Zemo" kod Međugorja i Auto kamp "Plivsko jezero" kod Jajca.

U zadnjih nekoliko godina sve je više ljubitelja paraglajdinga u Bosni i Hercegovini, kao i turista željnih avanturizma koji se odlučuju na let ispod bosanskohercegovačkog neba. Svake godine organizuju se paraglajding susreti i takmičenja u preletu i preciznom slijetanju.